



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Komunikadu Imprensa
Munisípiu Oekusi
04 Dezembru 2019

**JSMP realiza treinamentu ba estrutura suku no comunidade sira iha Suku Taiboko
RAEOA-Oekusi**

Iha 21 Novembru 2019 Judicial System Monitoring Programme (JSMP), organiza treinamentu ba estrutura suku nomós comunidade sira iha Suku Taiboko, Postu Administrativu Pantai Makasar, RAEOA-Oekusi.

Treinamentu ne'e ho objetivu atu fahe informasaun relevante ho demokrasia no prosesu lejislativu no asesu ba justisa formál ba membru estrutura suku no comunidade sira hodi hasa'e sira-nia koñesimentu kona-ba lala'ok sistema demokrasia, knaar no kompeténsia órgaun estadu ida-idak nian no mós oinsá membru comunidade sira bele asesu no utiliza sistema justisa formál ne'ebé eziste.

Totál partisipante hamutuk ema na'in 30 ne'ebé kompostu hosi fetu na'in 10 no mane na'in 20. Materia treinamentu ne'e fahe ba sesaun rua; sesaun primeiru kona-ba "saida mak estadu demokrátiku, póder sira órgaun sira Estadu nian, prosesu halo lei no oinsá públiku bele hola parte iha prosesu halo lei iha Parlamentu Nasionál". Enkuantu sesaun segundu kona-ba konseitu "direitu umanu, sistema justisa formál iha Timor-Leste, krime públiku no semi públiku, arguidu no vítima sira nia direitu bainhira envolve krime ruma".

"Treinamentu ne'e nu'udar meu ida hodi ajuda membru konsellu suku sira atu hakle'an liután sira-nia koñesimentu ba asuntu relevante sira, partikularmente relasiona ho sira-nia knaar no kompeténsia atu rezolve problema sira comunidade nian, nune'e, sira bele trata no atua problema sira ne'ebé mosu ho apropiadu," dehan Casimiro dos Santos, Diretór Interinu JSMP.

Xefe Suku, Taiboco iha ninia intervensaun durante sesaun abertura subliña katak Suku Taiboco ho nia populasaun barak tebes ne'ebé ho totál populasaun hamutuk 8.725 sei menus liu informasaun sira relasiona ho tópiku sira ne'ebé JSMP sei apresenta. Nia hatutan katak treinamentu kona-ba knaar órgaun soberanu no mós oinsá prosesu ba kazu sira tuir sistema justisa formal nu'udar treinamentu primeiravés ba nia suku no comunidade sira.

Xefe suku ne'e hato'o agradesimentu boot tebes ba JSMP ne'ebé hatudu interese hodi hili sira-nia suku atu fasilita informasaun sira ne'e ba ninia comunidade sira liuliu comunidade sira ne'ebé durante ne'e nunka hetan formasaun importante hirak hanesan ne'e.

Aleinde ne'e, partisipante sira mós espresa sira-ninia apresiasaun ne'ebé hanesan tanba konsidera treinamentu ne'e hanesan oportunidade ida ne'ebé importante no úniku tebes ba sira. Sira konsiente katak haree ba kondisaun estrada, distánsia, meiu komunikaun sira ne'ebé la iha, nune'e defisil ba membru estrutura suku no comunidade sira atu hetan informasaun sira hanesan ne'e.

Iha sesaun treinamentu, partisipante sira hato'o sira nia preokupasaun relasiona ho problema aman la fó alimentasaun ba oan sira ne'ebé as iha sira nia suku. Relasiona ho kestaun ne'e, JSMP esplika ba sira katak, bainhira aman ka inan ne'ebé la fó alimentasaun ba sira nia oan, bele prosesa tuir lei sivíl nian no ministériu públiku mak sei reprezenta menór hodi halo asaun kontra sira nia inan ka aman atu fó alimentasaun fulan-fulan ba menór. Maibé bainhira aman ka inan la kumpri desizaun tribunál ne'e, menór sira bele hato'o fali keixa hasoru inan ka aman liuhusi prosesu krime ne'ebé ho naran la halotuir obrigasaun alimentár.

Aleinde ne'e partisipante sira mós kestiona comunidade ne'ebé ladun kolabora ho autoridade sira hodi rezolve krime ho natureza semi públiku. Tanba tuir sira hatene katak funsaun estrutura suku no mós membru Konsellhu Polísiamentu Komunitáriu (KPK) bele rezolve krime sira ho natureza semi públiku ka krime ki'ik sira ne'ebé akontese iha comunidade. Relasiona ho kestaun ne'e, JSMP esplika kona-ba signifikaun husi krime semi públiku ho nia prosedimentu tuir lei.

JSMP hein katak ho atividade hirak ne'e, bele kontinua hasae koñesimentu comunidade sira iha área rurál kona-ba sistema justisa formál no órgaun soberanu nian.

Treinamentu ne'e realiza ho apoiu finanseiru husi Governu Timor-Leste, liuhusi Fundu Apoiu Sociedade Sivíl iha Gabinete Primeiru Ministru.

Atu hetan informasaun kompletu bele kontaktu:

Casimiro dos Santos
Diretór Interino JSMP
Email: casimiro@jsmp.tl
Telefone: 3323883 | 77257466